

**KOMISIJA ZA PRIPREMANJE PRIJEDLOGA ZA IZBOR U AKADEMSKO ZVANJE DOCENTA/ICE NA
PREDMETIMA NAUČNE OBLASTI KRIVIČNO PRAVO**

Sarajevo/Osijek, 26. 1. 2026. godine

NASTAVNO - NAUČNOM VIJEĆU UNIVERZITETA U SARAJEVU – PRAVNOG FAKULTETA

**Predmet: *Izveštaj Komisije za pripremanje prijedloga za izbor u akademsko zvanje docenta/ice na
predmetima naučne oblasti Krivično pravo***

Podaci o objavljenom konkursu i formiranju Komisije

a) Univerzitet u Sarajevu – Pravni fakultet je na osnovu usvojenog Dinamičkog plana potreba za raspisivanjem konkursa za izbor u zvanja u akademskoj 2025/2026. godini raspisao konkurs za izbor jednog nastavnika/ice u zvanje docenta/ice na predmetima naučne oblasti Krivično pravo. Konkurs je objavljen u dnevnom listu „Dnevni avaz“ i na web stranicama Univerziteta u Sarajevu i Univerziteta u Sarajevu – Pravnog fakulteta dana 8. 12. 2025. godine. U ostavljenom roku za podnošenje prijava na konkurs (15 dana od dana objavljivanja) prijavila se jedna kandidatkinja za izbor u zvanje docentice.

b) Nastavno - naučno vijeće Univerziteta u Sarajevu – Pravnog fakulteta je na svojoj 100. redovnoj sjednici održanoj 7. 1. 2026. godine na osnovu čl. 123. Zakona o visokom obrazovanju Kantona Sarajevo („Službene novine Kantona Sarajevo“, broj: 36/22 i 28/25 – dalje: ZVO KS 2022) donijelo Odluku o imenovanju Komisije za pripremanje prijedloga za izbor jednog nastavnika/ice u zvanje docenta/ice na predmetima naučne oblasti Krivično pravo (dalje: Komisija) br. 01-1630-1/26, u sastavu kako slijedi:

1. Dr. Borislav Petrović, profesor emeritus Univerziteta u Sarajevu – Pravnog fakulteta na predmetima naučne oblasti Krivično pravo, predsjednik i član,

2. Dr. Amila Ferhatović, redovna profesorica Univerziteta u Sarajevu – Pravnog fakulteta na predmetima naučne oblasti Krivično pravo, članica,

3. Dr. Barbara Herceg Pakšić, vanredna profesorica iz znanstvenog područja društvenih znanosti, znanstvenog polja pravo, znanstvene grane kazneno pravo, kazneno procesno pravo, kriminologija i viktimologija Sveučilišta Josipa Jurja Strossmayera u Osijeku – Pravnog fakulteta u Osijeku, članica.

c) Odlukom o imenovanju Komisije za izbor jednog nastavnika/ice u zvanje docenta/ice na naučnoj oblasti Krivično pravo br. 01-1630-1/26, u skladu sa članom 236. stav 4. Statuta utvrđena je i adekvatnost naučne oblasti na koju je izabrana članica Komisije dr. Barbara Herceg Pakšić, vanredna profesorica iz znanstvenog područja društvenih znanosti, znanstvenog polja pravo, znanstvene grane kazneno pravo, kazneno procesno pravo, kriminologija i viktimologija Sveučilišta Josipa Jurja Strossmayera u Osijeku – Pravnog fakulteta u Osijeku, obzirom da je u akademsko zvanje izabrana na drugom univerzitetu/fakultetu, a ne na Univerzitetu u Sarajevu (dalje: Univerzitet).

d) Navedenom Odlukom utvrđeno je da je zadatak Komisije da pisani Izveštaj sa prijedlogom za izbor u akademsko zvanje dostavi Vijeću Univerziteta u Sarajevu – Pravnog fakulteta u roku od 30 dana od imenovanja.

e) U skladu sa odredbom člana 256. stav (1) i (2) Statuta Komisija je 15. 1. 2026. godine održala konstituirajuću (on-line) sjednicu na kojoj je usvojila Poslovnik o radu, te uz prisustvo predstavnika Stručne službe Fakulteta otvorila pristigle prijave. Na raspisani konkurs **pristigla je jedna prijava** koju

je podnijela **dr. Kanita Pruščanović**, viša asistentica Univerziteta u Sarajevu – Pravnog fakulteta na naučnoj oblasti Krivično pravo.

Uvidom u prijavu dr. Kanite Pruščanović, Stručna služba Fakulteta konstatirala je da je kandidatkinja uz svojeručno potpisanu prijavu na konkurs, koja je zavedena pod brojem 01-1590/25 od 19. 12. 2025. godine na protokolu Univerziteta u Sarajevu – Pravnog fakulteta priložila sljedeće dokumente:

1. biografiju sa bibliografijom – Akademski *curriculum vitae*;
2. ovjerenu kopiju uvjerenja o stečenom zvanju doktorice pravnih nauka,
3. ovjerenu kopiju uvjerenja o položenim ispitima na III ciklusu studija,
4. ovjerenu kopiju diplome o stečevoj akademskoj tituli i zvanju magistar prava i ovjerenu kopiju dodatka diplomi,
5. ovjerenu kopiju Posebnog priznanja Zlatna značka Univerziteta u Sarajevu za I i II ciklus studija,
6. kopiju certifikata o pohađanju Dopunskog studija iz njemačkog prava i položenom završnom ispitu (*Begleitsstudium im deutschen Recht*), kojeg je organizirao Pravni fakultet Univerziteta u Sarajevu u saradnji sa Njemačkom fondacijom za međunarodnu pravnu saradnju (IRZ),
7. ovjerenu kopiju diplome o stečevoj akademskoj tituli i stručnom zvanju bakalaureat/ bachelor prava i ovjerenu kopiju dodatka diplomi,
8. ovjerenu kopiju Posebnog priznanja Zlatna značka Univerziteta u Sarajevu za I ciklus studija,
9. potvrdu dekanice Univerziteta u Sarajevu – Pravnog fakulteta o radnopravnom statusu (radni odnos s punim radnim vremenom s naznakom akademskih zvanja i perioda) počev od 16. 7. 2018. godine;
10. doktorsku disertaciju na temu „Saučiniteljstvo kao oblik saučesništva u savremenom krivičnom pravu“ (ukoričeni primjerak i u elektronskoj formi, na USB-u),
11. listu objavljenih radova, kao i same kopije radova,
12. dokaze o pohađanim seminarima i edukacijama,
13. dokaze o poznavanju tri strana jezika,
14. dodatnu dokumentaciju kojom se dokazuju ostvareni rezultati u oblasti naučnog i nastavnog rada,
15. izvod iz matične knjige rođenih,
16. uvjerenje o državljanstvu.

Kandidatkinja je, obzirom da je svečana promocija doktora nauka održana 22. 12. 2025. godine, 23. 12. 2025. godine dostavila i dopunu dokumentacije, protokolisanu pod br. 01-1590-1/25, priloživši:

1. Ovjerenu kopiju diplome o stečevoj akademskoj tituli i naučnom zvanju doktorice pravnih nauka,
2. Ovjerenu kopiju dodatka diplomi III ciklusa studija.

U skladu sa odredbom člana 256. stav (2) Statuta izdata je Potvrda o potpunosti (urednosti) prijave dr. Kanite Pruščanović na konkurs za izbor jednog nastavnika/ice u zvanje docenta/ice na naučnoj oblasti Krivično pravo, br. 01-1645-1/25 od 15. 1. 2026. godine, kojom se konstatira da je podnesena prijava shodno raspisanom konkursu: blagovremena (podnesena u roku određenom u konkursu), potpuna (priloženi svi dokazi o ispunjenosti uslova za izbor u zvanje docenta/ice), te vlastoručno potpisana od strane podnositeljice.

Nakon što je razmotrila prijavu i priloženu dokumentaciju kandidatkinje, Komisija podnosi sljedeći

IZVJEŠTAJ

1. Prijava kandidata/inje

Dr. Kanita Pruščanović konkurirala je za izbor u zvanje docentice na predmetima naučne oblasti Krivično pravo. Podnesena prijava, shodno raspisanom konkursu, je blagovremena (podnesena u roku određenom u konkursu: 19. 12. 2025. godine, uz dopunu dokumentacije izvršenu 23. 12. 2025. godine), potpuna (priloženi svi dokazi o uspunjenosti uvjeta za izbor u zvanje docentice shodno zakonskim i statutarnim odredbama), te vlastoručno potpisana od strane podnositeljice.

Kandidatkinja je u prijavi naglasila da se prijavljuje u skladu sa odredbom člana 176. ZVO KS 2022. Navedena odredba uređuje pitanje prelaznog perioda u vezi sa izborima u akademska zvanja, prema kojoj svi članovi akademskog osoblja koji su izabrani u akademsko zvanje prema odredbama zakona koji prestaje da važi njegovim stupanjem na snagu zadržavaju pravo da budu izabrani u isto ili više akademsko zvanje prema uvjetima propisanim ranijim zakonom. Ovo pravo važi samo za jedan izborni period u isto ili više akademsko zvanje. Slijedom navedenog, Komisija prijavu kandidatkinje cijeni u skladu sa uslovima propisanim članom 96. stav 1. tač. d) Zakona o visokom obrazovanju Kantona Sarajevo („Službene novine Kantona Sarajevo“, broj: 33/17, 35/20, 40/20 i 39/21) (u daljem tekstu: ZVO KS 2017).

Odredbom člana 96. stav 1. tač. d) ZVO KS 2017 propisani su sljedeći uvjeti za izbor u akademsko zvanje docenta/ice:

- naučni stepen doktora u datoj oblasti,
- najmanje tri naučna rada objavljena u priznatim publikacijama koje se nalaze u relevantnim naučnim bazama podataka,
- pokazane nastavničke sposobnosti.

2. Pravni osnov za postupanje Komisije

Na osnovu raspisanog konkursa, u postupku za pripremanje prijedloga za izbor u akademsko zvanje docenta/ice na predmetima naučne oblasti Krivično pravo, Komisija procjenjuje ispunjenost uvjeta za izbor koji su utvrđeni ZVO KS 2017 koji je prestao da važi i Uputama o realizaciji izbora u isto ili više akademsko zvanje na Univerzitetu u Sarajevu u skladu sa uslovima propisanim ranijim Zakonom (broj: 01-15-29/23 od 27.09.2023. godine, dalje: Upute), a primjenjuje procesna pravila koja su utvrđena važećim ZVO KS 2022 i Statutom.

3. Biografski podaci, obrazovanje, stečena zvanja i zaposlenje

Kanita Pruščanović rođena je 27. 3. 1995. godine u Zenici. Prvi ciklus studija na Pravnom fakultetu Univerziteta u Sarajevu završila je 2017. godine, stekavši stručno zvanje bakalaureat/ bachelor prava. Na prvom ciklusu studija ostvarila je prosjek ocjena 9.94, za što je odlikovana Posebnim priznanjem Zlatna značka Univerziteta u Sarajevu, kao najbolja studentica prvog ciklusa studija Pravnog fakulteta Univerziteta u Sarajevu. Na istom Fakultetu je 2018. godine završila i drugi ciklus studija na Katedri krivičnog prava, smjer Maloljetničko prestupništvo, stekavši zvanje magistrice prava, te je zbog ostvarenog prosjeka ocjena 10.00 i na drugom ciklusu studija odlikovana Posebnim priznanjem Zlatna značka Univerziteta u Sarajevu. Uporedo sa redovnim studijem je u periodu od 2015. do 2018. godine pohađala i polaganjem završnog ispita uspješno okončala Dopunski studij njemačkog prava (*Begleitstudium im deutschen Recht*) na Pravnom fakultetu Univerziteta u Sarajevu, koji je organiziran u saradnji sa Njemačkom fondacijom za međunarodnu pravnu saradnju (IRZ). Najzad, III ciklus studija na Univerzitetu u Sarajevu – Pravnom fakultetu, na Katedri krivičnog prava - Krivičnopravnom smjeru

okončala je 1. 7. 2025. godine, odbranom doktorske disertacije pod naslovom „Saučiniteljstvo kao oblik saučesništva u savremenom krivičnom pravu“, ostvarivši prosječnu ocjenu 10.00.

Tokom I ciklusa studija je u periodu februar 2015. godine – septembar 2017. godine bila angažirana kao demonstrator na Katedri pravno-ekonomskih nauka. Od jula 2018. godine zaposlena je na Pravnom fakultetu Univerziteta u Sarajevu u sljedećim zvanjima:

1. Stručna saradnica na naučnoj oblasti Krivično pravo, u periodu juli 2018. godine – juli 2022. godine,
2. Viša asistentica na naučnoj oblasti Krivično pravo, u periodu juli 2022. godine – sada.

4. Dosadašnje naučno i stručno usavršavanje

U cilju kontinuiranog naučnog i stručnog usavršavanja, kandidatkinja je pohađala i bila učesnica više različitih kurseva, radionica, seminara, edukacija, domaćih i međunarodnih skupova, kao i pravnih klinika. Kao studentica I i II ciklusa studija pohađala je četiri pravne klinike, i to iz oblasti međunarodnog i evropskog prava ljudskih prava (10. 2015. – 2. 2016.), medicinskog prava (2017.), prava djeteta (2017.) i *Trial Skills* (11. 2017. – 1. 2018.), kao i Akademiju za prevenciju maloljetničkog prijestupništva (9. 5. – 31. 5. 2016.). Značajnije ljetne škole koje je pohađala u inostranstvu su: *Ljetna škola njemačkog jezika i austrijske kulture i civilizacije* na Diplomatskoj akademiji u Beču (2014.), *Ljetna škola iz oblasti krivičnog prava „Law on the Bosphorus“* na Pravnom fakultetu Univerziteta u Istanbulu (2016. i 2017.) i *Ljetna škola njemačkog prava Njemačke fondacije za međunarodnu pravnu saradnju (IRZ)* u Bonnu (2016.). Kao studentica aktivno je učestvovala i na Međunarodnom film festivalu sa akademskim programom pod nazivom „Zločin i kazna“ u organizaciji Pravnog fakulteta Univerziteta u Istanbulu 2016. i 2017. godine, te na međunarodnoj konferenciji „Procesuiranje genocida u BiH“, gdje je uzela učešće na simuliranom suđenju u žalbenom postupku pred Mehanizmom za međunarodne krivične sudove, na čelu sa sudijom Theodorom Meronom kao Predsjedavajućim sudskog vijeća. U svrhu stručnog osposobljavanja za samostalni rad obavljala je kraće studentske prakse u Uniji turskih općina u Ankari i Istanbulu, Kantonalnom tužilaštvu Kantona Sarajevo i Zavodu za pružanje besplatne pravne pomoći Kantona Sarajevo.

Pored Posebnih priznanja Zlatna značka Univerziteta u Sarajevu na prvom i drugom ciklusu studija, te nagrada Načelnika Općine Centar Sarajevo za dobitnike posebnog priznanja „Zlatna značka Univerziteta u Sarajevu“, dobitnica je i Priznanja za doprinos razvoju, podizanju kvaliteta i ugleda Pravnog fakulteta Univerziteta u Sarajevu povodom 70. godišnjice osnivanja Pravnog fakulteta u Sarajevu, nagrade za najboljeg govornika i za osvojeno prvo mjesto na takmičenju „Adriatic Moot Court Competition“ u okviru *Crime Prevention Through Criminal Law and Security Studies* 2019. godine, nagrade za osvojeno drugo mjesto na takmičenju „Adriatic Moot Court Competition“ u okviru *Crime Prevention Through Criminal Law and Security Studies* 2018. godine, te priznanja za osvojeno prvo mjesto na *Državnom takmičenju u simulaciji suđenja iz oblasti krivičnog prava* 2016. godine.

Među seminarima i edukacijama vezanim za naučnu oblast krivično pravo, a koje je kandidatkinja pohađala u periodu od 2018. godine, odnosno od zasnivanja radnog odnosa na Univerzitetu u Sarajevu – Pravnom fakultetu po svom značaju ističu se:

1. ZOOM Webinar u organizaciji Ludwig-Maximilians-Universität München Vortragsreihe „Cyberkriminalität“, Ludwig-Maximilians-Universität München:
 - a. „Cyberkriminalität im aktuellen Strafrecht“, Dr. Kristina Peters, LMU München, 18. 11. 2021. godine,
 - b. „Modi Operandi im Netz – Polizeiliche Ermittlungen gegen Cyberkriminalität“, Florian Kreikemeyer, Bundeskriminalamt, Abteilung Cybercrime, 9. 12. 2021.,

2. webinar „6. Herbsttagung/ Medizinstrafrechtsabend“, Institut für Medizinrecht, Bucerius Law School Hamburg & Institut für Rechtsmedizin (Universitätsklinikum Eppendorf, Hamburg) na temu „Das Recht der Obduktion“, 24. 11. 2021. godine.

Na III ciklusu studija je u sklopu rada na doktorskoj disertaciji učestvovala na 2 studijska boravka, i to na Universität des Saarlandes, Saarbrücken, Njemačka, kao dobitnica Erasmus + stipendije za mobilnost, u periodu septembar – oktobar 2024. godine, i na Leiden Law School – Leiden University, u februaru 2023. godine, kao i realizirala kraće istraživačke posjete biblioteci Pravnog fakulteta Univerziteta u Istanbulu u novembru 2022., te novembru 2023. godine, te biblioteci Pravnog fakulteta Univerziteta u Beogradu. Uzela je učešće i na PhD kolokviju - Trećem seminaru studenata doktorskih studija na Pravnom fakultetu u Beogradu u maju 2023. godine, u okviru kojeg je prezentovala rezultate dotadašnjeg rada na doktorskoj disertaciji, dok su kao komentatori disertacije učešće uzeli prof. dr. Milan Škulić, redovni profesor Pravnog fakulteta Univerziteta u Beogradu i sudija Ustavnog suda Republike Srbije, i akademik, prof. dr. Dragan Jovašević, redovni profesor Pravnog fakulteta Univerziteta u Nišu.

Kandidatkinja govori engleski, njemački i turski jezik (na nivou C1). Članica je Alumni kluba *Njemačke fondacije za međunarodnu pravnu saradnju (IRZ)*.

5. Ocjena ispunjenosti uvjeta kandidatkinje za izbor u naučnonastavno zvanje docentice

5.1. Naučni stepen doktora u datoj oblasti

Na osnovu ovjerenih kopija Diplome o završetku trećeg ciklusa studija i Dodatka diplomi trećeg ciklusa studija od 22. 12. 2025. godine, Komisija je utvrdila da je kandidatkinja treći ciklus studija na Univerzitetu u Sarajevu – Pravnom fakultetu, Katedri krivičnog prava – Krivičnopravnom smjeru završila 1. 7. 2025. godine, odbranom doktorske disertacije na temu „Saučiniteljstvo kao oblik saučesništva u savremenom krivičnom pravu“. Kandidatkinja je III ciklus studija završila sa prosječnom ocjenom 10.00, te je okončanjem trećeg ciklusa studija stekla naučno zvanje doktorice pravnih nauka.

U sklopu dokumentacije kandidatkinja je dostavila i predmetnu doktorsku disertaciju, koja je napisana na 312 stranica. Nakon naslovnice s općim podacima slijedi sadržaj koji zauzima tri stranice, potom popis skraćenica na jednoj stranici, kao i sažetak disertacije na tri jezika (bos/hrv/srp, engleski i njemački jezik). Bibliografija disertacije proteže se na 30 stranica, te je korištena literatura razvrstana u dijelove: knjige, časopisi i zbornici, pravni propisi (podijeljeni u tri kategorije: BiH, bivša Jugoslavija i komparativno krivično zakonodavstvo), sudske odluke (podijeljene u 8 kategorija sudske prakse: sudovi niže instance u BiH, Vrhovni sud FBiH, Vrhovni sud RS, Apelacioni sud BD BiH, Vijeće Apelacionog odjeljenja Suda BiH, Ustavni sud BiH, sudovi u okviru bivše Jugoslavije, te strani sudovi), te internet izvori. Uvidom u bibliografiju primjetno je da je literatura koju je kandidatkinja koristila pri izradi disertacije brojna, recentna i raznovrsna, te uključuje izvore na bos/hrv/srp jezicima, kao i na engleskom, njemačkom i turskom jeziku.

U sadržajnom smislu, doktorska disertacija, uz dio posvećen teorijsko-metodološkom okviru (sedam stranica) i zaključak (deset stranica), sadrži šest dijelova podijeljenih na manja poglavlja i potpoglavlja, sa ukupno 1042 bilješke ispod teksta (fusnote). U prvom dijelu pod naslovom „Teorijsko-metodološki okvir istraživanja“ predstavljen je predmet istraživanja, svrha i cilj istraživanja, sistem hipoteza, struktura doktorske disertacije i metode istraživanja. Tako je kao predmet istraživanja disertacije predstavljeno saučiniteljstvo, kao institut općeg dijela materijalnog krivičnog prava koji predstavlja najintenzivniji oblik zajedničkog učešća više osoba u ostvarenju krivičnog djela, te se može promatrati kao oblik saučesništva, ali i kao jedan od oblika učiniteljstva. Naročitu naučnu i praktičnu relevantnost navedenom predmetu istraživanja daje činjenica da krivična djela ostvarena u saučesništvu predstavljaju veću društvenu opasnost u odnosu na solitarni kriminal, te se saučiniteljstvo izdvaja kao

najteži oblik saučesništva, zbog čega je potrebno razmotriti šta je distinktivna karakteristika koja saučiniteljstvo izdvaja u odnosu na oblike saučesništva u užem smislu, te kako uspostaviti svojevrsnu demarkacionu liniju između oblika saučesništva. Također, naznačeno je i da se međunarodna krivična djela najčešće čine učešćem više osoba, pa su u ovoj oblasti prisutna složena pitanja u vezi sa saučesništvom generalno, saučiniteljstvom kao oblikom saučesništva u širem smislu, kao i institutima zajedničkog zločinačkog poduhvata (ZZP) i komandne odgovornosti. Nastavno na predmet istraživanja, naznačeno je da je pregledom ranijih istraživanja u BiH konstatirana deficitarnost u pogledu obuhvatnosti, ali i učestalosti iscrpnog naučnog promatranja saučiniteljstva, budući da postoje sporadična i fragmentarna istraživanja kroz stručne i naučne, kao i završne i specijalističke radove, ali ne i opsežnija, sistematska obrada u vidu doktorske disertacije. Nadalje, navedena su i istraživačka pitanja, koja su usmjerena u prvom redu na saučesništvo, kao viši rodni pojam, a potom na saučiniteljstvo, i to u teoriji, zakonodavstvu i praksi, u domenu nacionalnog, komparativnog i međunarodnog krivičnog prava. Istraživačka pitanja koreliraju sa sistemom hipoteza, te su glavne hipoteze istraživanja da je dualistički model uređenja materije saučesništva dominantan u savremenom komparativnom krivičnom pravu, te da je saučiniteljstvo najzastupljeniji oblik saučesništva u sudskoj praksi u BiH. Pored glavnih, postavljene su i četiri pomoćne hipoteze, te su navedene metode istraživanja koje su korištene prilikom izrade predmetne doktorske disertacije.

Disertacijom se, polazeći od instituta saučesništva (drugi dio disertacije, „Pojam i oblici saučesništva u savremenom krivičnom pravu“), saučiniteljstvo elaborira kroz prizmu savremene krivičnopravne dogmatike (treći dio disertacije, „Teorijsko razgraničenje saučiniteljstva i saučesništva u užem smislu“). Nakon iscrpne teorijske, doktrinarne razrade instituta saučesništva, odnosno saučiniteljstva kao oblika saučesništva, ukazuje se i na genezu pozitivnopravnog rješenja u krivičnom zakonodavstvu u BiH (četvrti dio disertacije, „Saučiniteljstvo u krivičnom pravu Bosne i Hercegovine“). Bitno je istaći da značajan dio provedenog istraživanja čini i komparativnopravna analiza (peti dio, „Saučiniteljstvo kao oblik saučesništva u savremenom komparativnom krivičnom pravu“), čime je omogućeno vrijednovanje pozitivnopravnog rješenja saučiniteljstva u krivičnom zakonodavstvu u BiH. Naime, komparativnopravni uzorak produbljene komparativnopravne analize čine zemlje bivše Jugoslavije, zatim Njemačka, kao zemlja porijekla teorije o vlasti nad djelom, te Austrija i Švicarska, kao i Norveška i Danska. Time je uklon istraživanja sa dominantnog, dualističkog modela, proširen i na zemlje monističkog modela, što je naročito značajno jer je u savremenoj literaturi upravo monistički model iscrpno analiziran i vrijednovan kao model mogućeg rješenja za postojeće izazove u pravnoj kvalifikaciji i razgraničenju oblika učešća u ostvarenju međunarodnih krivičnih djela. Uz naprijed navedeno, zasebno poglavlje disertacije posvećeno je i međunarodnom krivičnom pravu, gdje su analizirani oblici saučesništva, kao i distinktivne karakteristike saučiniteljstva u međunarodnom krivičnom pravu, uz osvrt na dodirne tačke, odnosno sličnosti i razlike sa zajedničkim zločinačkim poduhvatom i komandnom odgovornošću, kao oblicima izvedene odgovornosti. Posljednje poglavlje disertacije čini empirijsko - istraživački dio (sedmi dio, „Empirijsko - istraživački dio – Saučiniteljstvo u praksi sudova u Bosni i Hercegovini“), kojim je, uz široki uklon na sudsku praksu koji je ostvaren kroz cjelokupnu disertaciju, izvršena i kvalitativna analiza prakse sudova najviše instance u BiH. Najzad, u zaključku, koji se proteže na deset stranica, je, obzirom da svaki dio rada sadrži i zaključna razmatranja, odnosno međuzaključke, predstavljen sažetak zaključaka predmetnog istraživanja, koji su sintetizirani, odnosno reevaluirani iznošenjem sumarnih zaključaka.

Slijedom navedenog, doktorska disertacija kandidatkinje dr. Kanite Pruščanović pod naslovom „Saučiniteljstvo kao oblik saučesništva u savremenom krivičnom pravu“ je samostalni naučno utemeljen istraživački rad iz oblasti materijalnog krivičnog prava, koji, pored teorijskog, ima i značajan empirijsko-istraživački karakter, obzirom da je oslonjen na dosadašnja naučna istraživanja, recentnu literaturu iz predmetne oblasti, zakonodavstvo, ali i sudsku praksu, uz naglašen komparativnopravni uklon, kao i uklon na međunarodno krivično pravo. Specifičan naučni doprinos predmetnog istraživanja sastoji se u iscrpnosti naučne razrade ostvarenoj na više različitih razina, obzirom da je

institut saučiniteljstva analiziran iz ugla krivičnog prava, odnosno dogmatike, krivičnog prava BiH, komparativnog i međunarodnog krivičnog prava, ali i sudske prakse. Bitno je istaći da su teorijska izlaganja u okviru disertacije obogaćena širokim uklonom na sudsku praksu, čime su izloženi teorijski koncepti, kao i pozitivnopravna rješenja potkrijepljeni primjerima konkretne primjene. Štaviše, iako su relevantni primjeri iz sudske prakse integrirani kroz cjelokupnu disertaciju, radi sistematičnosti, ali i iscrpnosti izlaganja posljednje poglavlje disertacije posvećeno je empirijskom istraživanju, gdje uzorak istraživanja čine izabrane odluke sudova najviše instance u BiH. S druge strane, izvršenom komparativnopravnom analizom ujedno su pruženi i primjeri za moguće legislativne intervencije u nacionalnom zakonodavstvu *de lege ferenda*. Najzad, značaj dijela disertacije posvećenog međunarodnom krivičnom pravu ogleda se u činjenici da je istim ukazano na genezu razvoja instituta, ali i uspostavljena višestruko značajna komparativna ravan saučiniteljstva sa oblicima izvedene odgovornosti, među kojima su zajednički zločinački poduhvat i komandna odgovornost.

Zaključak I

Dr. Kanita Pruščanović ispunjava uvjet vezan za naučni stepen doktora u datoj oblasti.

5.2. Naučnoistraživački rad kandidatkinje

5.2.1. Pregled bibliografskih jedinica kandidatkinje

a) Radovi objavljeni do izbora u zvanje stručne saradnice

1. The 1973 Coup in Chile: Dealing with the Pinochet – Era Crimes, the Fight against Impunity and the Chilean path to democracy. *7th International Crime and Punishment Film Festival "Protection of Rule of Law against Terrorism and The Coups"*, Academic Papers, 3 – 9 November 2017, Istanbul, p. 210 – 218.
2. World Universities Comparative Law Project, Legal rating of Bosnia and Herzegovina (u koautorstvu sa: Herenda Tahirom, Išerić Harunom, Odobašić Nihadom & Šaćirović Enidom). *Allen & Overy Global Law Intelligence Unit*, 2017. (dostupno i online: http://www.worldunilaw.com/media/1120/bosnia-herzegovina_bk-41917897-v1-bosnia_herzegovina_university_project.pdf)
3. Poverty as a post-war struggle in Bosnia and Herzegovina. *6th International Crime and Punishment Film Festival "Poverty"*, Academic papers, 30 September - 6 October 2016, Istanbul, p. 463 – 478.
4. Memorializacija i novi pristup memorializacijskoj praksi u BiH, 2015. (esej nastao u okviru seminara „Tranzicijska pravda – put ka miru“, dostupan online: <http://www.mreza-mira.net/vijesti/memorializacija-i-novi-pristup-memorializacijskoj-praksi-u-bih/>)

b) Radovi objavljeni tokom izbornog perioda u zvanju stručne saradnice

5. Prednosti alternativnog rješavanja sporova (u koautorstvu sa: Hebib Mirzom i Ruhotina Anisom). *Pravna misao*, 2019, br. 7 – 8, str. 103 – 107, prikaz.
6. Kućni zatvor sa elektronskim nadzorom (u koautorstvu sa: Petrović Borislavom i Ferhatović Amilom). *Godišnjak Pravnog fakulteta u Sarajevu*, 2019, god. LXII, str. 673 – 708, prethodno naučno saopćenje.
7. Teorijsko razgraničenje saučiniteljstva i saučesništva u užem smislu (u koautorstvu sa Ferhatović Amilom). *Godišnjak Pravnog fakulteta u Sarajevu*, 2020, god. LXIII, str. 71 – 98, izvorni naučni rad.

Zaključak II:

Budući da se ispunjenost uslova za izbor u zvanje docentice koji se odnosi na objavljene naučne radove u pravilu cijeni u periodu od posljednjeg izbora u zvanje, Komisija naprijed naznačene radove objavljene do izbora u zvanje više asistentice ne razmatra, niti sadržajno ocjenjuje kod ocjene ispunjenosti uvjeta za izbor u zvanje docentice.

Ipak, naročito imajući na umu da ni radovi objavljeni tokom izbornog perioda u zvanju stručne saradnice nisu bili uslov za izbor u više zvanje, Komisija konstatira da naprijed naznačeni radovi govore u prilog kontinuiranog i predanog naučnoistraživačkog rada kandidatkinje, koji je ostvaren ne samo u toku izbornog perioda u zvanje stručne saradnice, nego i tokom pohađanja I, odnosno II ciklusa studija. Također, potrebno je konstatirati da su:

- 1) radovi, odnosno izvještaj koji je objavljen u toku izbornog perioda u zvanju stručne saradnice objavljeni u priznatim indeksiranim publikacijama (*Godišnjak Pravnog fakulteta, Pravna misao*), među kojima su dva (2) rada kategorizirana kao izvorni naučni radovi,
- 2) među radovima objavljenim do izbora u zvanje stručne saradnice, na engleskom jeziku su objavljena dva (2) rada u zbornicima Međunarodnog film festivala sa akademskim programom „Crime and Punishment Film Festival“, te publikacija u okviru prestižnog svjetskog projekta u kojem su učestvovali univerziteti diljem svijeta „World Universities Comparative Law Project, Legal rating of Bosnia and Herzegovina“, što predstavlja naročit uspjeh u kontekstu internacionalizacije naučnoistraživačkog rada.

c) Radovi objavljeni tokom izbornog perioda u zvanju više asistentice

Kandidatkinja je dostavila šest (6) objavljenih radova, koji će u nastavku biti predmetom ocjene od strane Komisije.

1. Saučiniteljstvo kao oblik saučesništva u međunarodnom krivičnom pravu. *Godišnjak Pravnog fakulteta u Sarajevu*, 2025, god. LXVIII, str. 71 – 102. (izvorni naučni rad).

Međunarodno krivično pravo suočeno je sa brojnim izazovima u utvrđivanju krivične odgovornosti za međunarodna krivična djela, čemu naročito doprinosi složenost njihove fenomenologije. Naime, kolektivni kriminal i institut saučesništva u domenu međunarodnog krivičnog prava poprimaju naročitu konotaciju, jer su međunarodna krivična djela u pravilu sistematska, masovnih razmjera, kolektivne prirode, uz svojevrsnu političku konotaciju, pa se nerijetko u potencijalnom lancu odgovornosti u vezi sa učinjenjem krivičnog djela mogu naći brojne horizontalno i vertikalno organizirane osobe. Unatoč tome, u domenu saučesništva je dugo vremena postojala svojevrsna podnormiranost, odnosno izostanak preciznog reguliranja, što je predstavljalo naročit izazov za sudsku praksu. Tako je međunarodno krivično pravo prvobitno počivalo na monističkom modelu, označavajući sve učesnike u ostvarenju krivičnog djela učiniteljima, te vremenom, razvojem međunarodnog krivičnog prava, ipak dolazi do diferencijacije učitelja i saučesnika.

Autorica u radu, nakon osvrta na pojam i oblike saučesništva u međunarodnom krivičnom pravu generalno, iscrpno elaborira institut saučiniteljstva, i to s fokusom na shvatanje saučiniteljstva u praksi Haškog tribunala i ICC-a, čime je ukazano da je ono imalo određeni razvojni put, odnosno da je doživjelo svojevrsnu genezu kroz praksu međunarodnih sudova. Pored saučiniteljstva, u središte naučnog promatranja stavljeni su i zajednički zločinački poduhvat i komandna odgovornost, kao oblici izvedene odgovornosti. Tako je kroz izlaganja istaknuto da između saučiniteljstva i zajedničkog zločinačkog poduhvata ne stoji znak jednakosti, jer je saučiniteljstvo oblik neposredne odgovornosti,

dok je zajednički zločinački poduhvat izvedeni oblik odgovornosti. Ipak, i posredstvom konstrukcije zajedničkog zločinačkog poduhvata se učesnici u ostvarenju zajedničkog zločinačkog poduhvata mogu pravno kvalificirati kao saučinitelji. Najzad, uspostavljanjem komparativne ravni komandne odgovornosti, kao oblika izvedene odgovornosti, sa saučesništvom, primjetne su određene sličnosti, ali i brojne razlike, koje su iscrpno elaborirane.

Slijedom navedenog, autorica je u radu, počevši od pojmovnog određenja saučesništva i osvrta na oblike saučesništva u statutima najznačajnijih međunarodnih sudova, detaljno elaborira genezu u pravnom shvatanju saučiniteljstva u međunarodnom krivičnom pravu, s naročitim osvrtom na praksu Haškog tribunala i ICC. Pored osvrta na teoriju vlasti nad djelom kao primjer uspješnosti primjene krivičnopravne dogmatike u pravnim shvatanjima ICC-a, naročitu vrijednost ima i uspostavljena komparativnopravna ravan saučiniteljstva sa zajedničkim zločinačkim poduhvatom i komandnom odgovornošću, kao oblicima izvedene odgovornosti.

Rad je objavljen u Godišnjaku Pravnog fakulteta u Sarajevu, koji se indeksira u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (Hein Online). Navedeni rad predstavlja prilagođeni dio doktorske disertacije kandidatkinje, te je od strane recenzenata ocijenjen kao izvorni naučni rad, koji sadrži neobjavljene i nove rezultate originalnih istraživanja u potpunom obliku, daje značajan doprinos određenoj naučnoj problematici ili njenom razumijevanju i opisuje nove rezultate istraživanja iz navedene oblasti.

2. Violence Against Women and Domestic Violence in Bosnia and Herzegovina: An Overview of the Implementation of the Istanbul Convention. In: 12th International Crime and Punishment Film Festival "We Are Equal" (str. 353 – 370). Istanbul: On iki levha, 2024. (prethodno naučno saopćenje)

Predmetni rad tematizira problematiku nasilja nad ženama i nasilja u porodici u Bosni i Hercegovini, osvrtom na primjenu Istanbulske konvencije u Bosni i Hercegovini. U tom pogledu je u prvom redu iznesen hronološki slijed, počevši od potpisivanja Istanbulske konvencije ka daljim preduzetim koracima u implementaciji Istanbulske konvencije. Bosna i Hercegovina je Istanbulsku konvenciju potpisala na simboličan datum, 8. marta 2013. godine, te je bila među prvim državama članicama Vijeća Evrope koje su ratificirale Konvenciju. Ratifikacija je izvršena 7. novembra 2013. godine, nakon čega je Konvencija stupila na snagu 1. augusta 2014. godine. Važno je istaći da BiH prilikom potpisivanja i ratifikacije Konvencije nije izjavila nikakve rezerve u odnosu na njene odredbe, čime je izrazila punu posvećenost preduzimanju svih zakonodavnih i drugih aktivnosti neophodnih za osiguranje pravnog, institucionalnog i organizacijskog okvira za prevenciju nasilja nad ženama, zaštitu žrtava i sankcioniranje učinitelja.

U oktobru 2015. godine Vijeće ministara BiH usvojilo je Okvirnu strategiju za provedbu Konvencije Vijeća Evrope o sprječavanju i borbi protiv nasilja nad ženama i nasilja u porodici za period 2015–2018, čiji je cilj bio osigurati dosljednu, kvalitetnu i efikasnu provedbu Konvencije u BiH. Navedena strategija predstavljala je sveobuhvatan okvir koji je definirao način provedbe Istanbulske konvencije u BiH i harmonizacije pravnog i institucionalnog okvira s odredbama Konvencije, utvrdio prioritete, te definirao strateške mjere i odgovarajuće obaveze različitih institucija u zemlji. Dodatno, u augustu 2019. godine Vijeće ministara BiH donijelo je Odluku o osnivanju Odbora za praćenje provedbe i izvještavanje po Istanbulskoj konvenciji i femicidu u Bosni i Hercegovini.

Obzirom da BiH u skladu s članom 68. stav 1. Istanbulske konvencije sačinila i dostavila Izvještaj o zakonodavnim i drugim mjerama koje odredbe ove konvencije čine pravnosnažnim (*Baseline Report*), a koji je Grupa eksperata za djelovanje protiv nasilja nad ženama i nasilja u porodici (GREVIO) zaprimila 6. februara 2020. godine, radom je dat osvrt na navedeni izvještaj, kao i na istraživanje Atlantske

inicijative iz 2016. godine „Analiza sudske prakse u predmetima nasilja u porodici u BiH“, te Istraživanje Misije OSCE-a o dobrobiti i sigurnosti žena u BiH iz 2019. godine.

Slijedom navedenog, radom je dat pregled relevantnog zakonodavstva, uz zasebne dijelove posvećene implementaciji Istanbulske konvencije kroz Zakon o ravnopravnosti spolova u Bosni i Hercegovini, Zakon o zaštiti od nasilja u porodici Federacije Bosne i Hercegovine, te krivično, kao i drugo relevantno zakonodavstvo. Zasebno poglavlje posvećeno je i pitanju istrage i krivičnog gonjenja u predmetima nasilja nad ženama i nasilja u porodici, kao i relevantnoj statistici u ovoj oblasti, nakon čega su izvedeni zaključci u odnosu na iznesene statističke podatke, ali i generalno u pogledu implementacije Istanbulske konvencije u Bosni i Hercegovini. Time su ujedno izneseni i prijedlozi u pogledu konkretnih aspekata implementacije koji trebaju biti poboljšani.

Rad je kandidatkinja predstavila na akademskom programu 12. Međunarodnog film festivala „Zločin i kazna“, koji se održavao u periodu od 18.11. – 24.11.2022. godine na Pravnom fakultetu Univerziteta u Istanbulu, sa središnjom temom „We are equal“, a tek dvije godine poslije objavljen je u Zborniku radova (na engleskom jeziku), koji nije indeksiran.

Obzirom da rad nije kategoriziran u objavljenom zborniku, Komisija cijeni navedeni rad kao prethodno naučno saopćenje, koje sadrži nove, još neobjavljene rezultate originalnih istraživanja, ali u preliminarnom obliku.

3. Treći seminar studenata doktorskih studija: PhD Colloquium (u koautorstvu sa Ruhotina Anisom). Pravna misao, 2023, br. 11 - 12, str. 62 – 65 (prikaz).

Tekst predstavlja iscrpan izvještaj o Trećem seminaru studenata doktorskih studija – PhD Colloquium, održanom 10. i 11. maja 2023. godine na Pravnom fakultetu Univerziteta u Beogradu, a u saradnji s Institutom za pravne i društvene nauke i Centrom za sociološkopravna istraživanja. Seminar se sastojao od radionica i radnih sesija koje su održane u hibridnoj formi, i to u prostorijama Pravnog fakulteta Univerziteta u Beogradu i *online* putem webex platforme.

Cilj seminara bio je okupiti doktorante i eksperte iz oblasti različitih tema doktorskih disertacija kandidata iz zemalja regiona, ali i šire, te time stvoriti svojevrsnu platformu za razmjenu ideja i iskustava u vezi s cjelokupnom procedurom izrade i odbrane dosadašnjeg istraživačkog rada, dobiti konstruktivne komentare i sugestije za unapređenje svoje doktorske disertacije od eminentnih autoriteta iz predmetnih oblasti, kao i razmijeniti ideje s drugim doktorantima. Na seminaru je učestvovalo 20 doktoranata iz sedam zemalja regiona i Evrope, kao i 42 komentatora iz 13 zemalja, uključujući zemlje regiona, Evrope, ali i Argentinu i Kolumbiju. U okviru dvodnevnog seminara, učešće su uzeli doktoranti i profesori sa 22 različite akademske institucije, među kojima su univerziteti i istraživački instituti, ali i advokatske kancelarije.

Prikaz je objavljen u časopisu "Pravna misao", koji se indeksira u bazama ERICH PLUS i Legal Source (EBSCOhost), a uvršten je i u Ulrichweb Global Serials Directory.

4. Kontinuitet zaštite oštećenog krivičnim djelom u sistemu krivičnog i građanskog pravosuđa: prevencija sekundarne viktimizacije u svjetlu najnovijih izmjena Zakona o parničnom postupku pred Sudom Bosne i Hercegovine (u koautorstvu sa Ruhotina Anisom). Zbornik radova Pravnog fakulteta u Splitu, 2023, vol. 60, br. 4, str. 779 – 807 (pregledni naučni rad).

Predmetni rad problematizira pitanje kontinuiteta zaštite oštećenog krivičnim djelom u sistemu krivičnog i građanskog pravosuđa. U prvom redu, bitno je istaći da se oštećeni krivičnim djelom, u ovisnosti od uklona, različito oslovljava, pa materijalno krivično pravo dominantno govori o pasivnom subjektu krivičnog djela, krivično procesno pravo o oštećenom, dok se pojam žrtve uglavnom koristi u viktimološkim, kriminalističkim i kriminološkim promatranjima. Viktimološki promatrano, položaj oštećenog krivičnim djelom primarno se razmatra u domenu krivičnog pravosuđa. Međutim, u

situacijama kada je određen događaj istovremeno i krivičnopravno i građanskopravno relevantan, pitanje zaštite oštećenog krivičnim djelom potrebno je, osim u sistemu krivičnog pravosuđa, promatrati i u sistemu građanskog pravosuđa. S tim u vezi javila se potreba za proširenjem mjera zaštite oštećenog u krivičnom postupku i na naknadni parnični postupak, kako bi se osigurao kontinuitet zaštite, ali i kako zaštita pružena u krivičnom postupku ne bi izgubila svoj smisao u naknadnom parničnom postupku. Najpotpuniji vid zaštite oštećenog u krivičnom postupku predstavlja mjera zaštite identiteta tokom, pa čak i određeni period po okončanju postupka. Upravo u nastojanju da se osigura istovjetna zaštita i u kasnijem parničnom postupku, odnosno prevenira sekundarna viktimizacija oštećenog, došlo je do promišljanja o preslikavanju mjere zaštite identiteta u građansko pravosuđe.

U svjetlu navedenog, pitanje zaštite oštećenog prevazilazi granice krivičnog pravosuđa, time prerastajući u zajednički interes krivičnog i građanskog pravosuđa. Zakonom o dopunama Zakona o parničnom postupku pred Sudom Bosne i Hercegovine iz 2021. godine su tako parničnim zakonodavstvom implementirane odredbe o zaštiti identiteta oštećenog krivičnim djelom, što predstavlja pionirski poduhvat kojim se u fokus stavlja zaštita identiteta stranaka u parničnom postupku. Time je ustanovljen posebni postupak u parnicama povodom ostvarivanja prava lica kojima su određene mjere u cilju zaštite identiteta. Slijedom navedenog, okosnicu izlaganja predmetnog rada čini ovaj posebni postupak, ali i širi kontekst položaja i zaštite oštećenog krivičnim djelom u sistemu krivičnog i građanskog pravosuđa, tako objedinjujući krivičnopravna, viktimološka, kao i građanskopravna promatranja.

U radu se, počevši od pitanja položaja lica oštećenog krivičnim djelom u sistemu krivičnog i građanskog pravosuđa, detaljno analizira aspekt ostvarivanja imovinskopravnog zahtjeva nastalog učinjenjem krivičnog djela, ali i pitanje zaštite oštećenog krivičnim djelom. Osvrtom na pojam primarne i sekundarne viktimizacije, istaknuto je da rizik sekundarne viktimizacije, nesporno prisutan počevši od momenta prijave krivičnog djela, kroz postupanje policijskih službenika, preko krivičnog postupka, prati oštećenog i u eventualnom kasnijem parničnom postupku. Prateći naprijed naznačeni slijed, iscrpno se analizira pitanje zaštite oštećenog, i to kroz aspekt zaštite oštećenog kao svjedoka u krivičnom postupku, ali i krivičnopravne zaštite svjedoka inkriminacijama Sprečavanja dokazivanja, Povrede tajnosti postupka i Otkrivanja identiteta zaštićenog svjedoka. Najzad, u radu se detaljno analizira pitanje obezbjeđenja kontinuiteta mjera zaštite u parničnom postupku, i to iscrpnim osvrtom na hodogram preduzetih zakonodavnih aktivnosti na nivou BiH, ali i na sami posebni postupak u parnicama povodom ostvarivanja prava lica kojima su određene mjere s ciljem zaštite identiteta.

Zbornik radova Pravnog fakulteta u Splitu referira se u Dimensions (Digital Science & Research Solutions), DOAJ (Directory of Open Access Journals), ERIH PLUS, HeinOnline Law Journal Library, HRČAK i Scite. Od strane recenzenata ocijenjen je kao pregledni naučni rad, koji sadrži cjelovit prikaz stanja određenog područja teorije i njene primjene, dok autorice donose vlastiti kritički osvrt i ocjenu, uz navođenje podataka o svim objavljenim radovima korištenim kao polazište za svoj rad.

5. Razvoj i perspektiva medicinskog krivičnog prava u Bosni i Hercegovini (u koautorstvu sa Ferhatović Amilom). Godišnjak Pravnog fakulteta u Sarajevu, 2023, LXVI, str. 45 – 72 (izvorni naučni rad).

Liječnička djelatnost dijelom je zdravstvene djelatnosti, koja je, obzirom na svoju usmjerenost na zaštitu zdravlja pojedinca, porodice i cjelokupnog stanovništva, pozicionirana kao djelatnost od naročitog društvenog interesa. Pravna regulativa ove oblasti sadržana je u okviru relativno novije pravne grane medicinskog prava, čijoj sve većoj društvenoj aktualizaciji svjedočimo upravo u XXI stoljeću. Prateći razvoj medicine, medicinsko pravo se kontinuirano razvija i usavršava, susrećući se sa brojnim izazovima, te kao svoj neizostavan segment i subdisciplinu etablira i medicinsko krivično pravo. Slijedom uloge krivičnog prava u zaštiti najznačajnijih društvenih dobara i vrijednosti,

medicinsko krivično pravo, zbog neprikosnovenog značaja zdravlja kao pravnog dobra, kao *ultima ratio* pravnog poretka štiti zdravlje pojedinca, ali i javno zdravlje, obuhvatajući širok dijapazon delikatnih pravnih pitanja koja uključuju liječnika, kao osnovnog, samostalnog i odgovornog nosioca zdravstvene djelatnosti, s jedne strane, te pacijente s druge strane.

Fokus medicinskog krivičnog prava globalno čine brojne teme, kao što su krivnja liječnika općenito, informirani pristanak, odnosno krivnja za samovoljno liječenje, inkriminacije nesavjesnog liječenja i nepružanja medicinske pomoći, liječnička tajna i krivnja za kršenje liječničke tajne, krivično djelo čedomorstva, pobačaj i pravni problemi pobačaja, pravni aspekti intenzivne medicine, presađivanje dijelova ljudskog tijela, odnosno krivnja za nedozvoljeno presađivanje dijelova ljudskog tijela, nedozvoljenu trgovinu organima i transfuziju krvi, krivična djela prenošenja spolne i zarazne bolesti, osobe s duševnim smetnjama, odnosno pitanja neuračunljivosti i smanjene uračunljivosti, isključenja krivnje, mjera sigurnosti obaveznog psihijatrijskog liječenja, posebnih prava osoba s duševnim smetnjama, te odnos krivičnog prava i ovisnosti, kroz brojne segmente među kojima se naročito ističe zloupotreba opojnih droga, mjera sigurnosti obaveznog liječenja od ovisnosti, te legalizacija i dekriminalizacija lakih droga.

Slijedom navedenog, autorice su se u radu osvrnule na razvoj i perspektivu medicinskog krivičnog prava konkretno u Bosni i Hercegovini, te ukazale na pojedina naročito prijemna pitanja u teoriji, zakonodavstvu, ali i u sudskoj praksi Bosne i Hercegovine.

Rad pod istim nazivom je prvi put prezentiran u okviru sesije „Odgovornost u medicini” na II Kongresu Ljekarske/Liječničke komore FBiH sa međunarodnim učešćem na temu „Medicinsko pravo”, održanom od 11.11. do 13.11.2022. godine na Medicinskom fakultetu Univerziteta u Tuzli. Predmetni rad nije publiciran niti korišten od strane Ljekarske/ Liječničke komore FBiH, zbog čega su autorice zadržale sva autorska prava na objavu kompletnog rada. Ljekarska/ Liječnička komora FBiH zadržala je pravo da objavi sažetak predmetnog rada u Zborniku sažetaka II Kongresa Ljekarske/Liječničke komore FBiH sa međunarodnim učešćem na temu „Medicinsko pravo”.

Rad je objavljen u Godišnjaku Pravnog fakulteta u Sarajevu, koji se indeksira u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (Hein Online). Od strane recenzenata ocijenjen je kao izvorni naučni rad, koji sadrži neobjavljene i nove rezultate originalnih istraživanja u potpunom obliku, daje značajan doprinos određenoj naučnoj problematici ili njenom razumijevanju i opisuje nove rezultate istraživanja iz navedene oblasti.

6. Pravni položaj liječnika u svjetlu medicinskog prava (u koautorstvu sa Ferhatović Amilom). Godišnjak Pravnog fakulteta u Sarajevu, 2022, LXV, 31 – 62. (izvorni naučni rad).

Liječnička djelatnost pravno je regulirana medicinskim pravom, kao relativno novijom pravnom disciplinom, koja vremenom, u skladu sa tokovima razvoja društva i nauke, sve više dobiva na značaju. Tim slijedom svjedočimo fenomenu juridizacije medicine, ali i sve većoj potrebi za multidisciplinarnim promatranjem brojnih delikatnih pitanja kroz prizmu medicine, pravne nauke i prakse, etike, pa čak i integrativne bioetike. Pravna odgovornost liječnika, predstavljajući doktrinarno, ali i praktično značajno pitanje, koncipirana je kao višestruka deliktna odgovornost, među kojima je i krivična odgovornost, kao najteži vid pravne odgovornosti liječnika. Tako je i medicinsko krivično pravo neizostavan dio medicinskog prava, gdje krivično pravo kao *ultima ratio* pravnog poretka štiti zdravlje pojedinca i javno zdravlje, obuhvatajući širok dijapazon delikatnih pravnih pitanja koja uključuju liječnika, kao osnovnog, samostalnog i odgovornog nosioca zdravstvene djelatnosti, s jedne strane, te pacijente s druge strane. U navedenom dijapazonu ističu se pitanja krivnje liječnika općenito,

informiranog pristanka, odnosno krivnje za samovoljno liječenje, inkriminacije nesavjesnog liječenja i nepružanja medicinske pomoći, institut liječničke tajne i krivnja za kršenje liječničke tajne, pravni aspekti intenzivne medicine, ali i brojna druga.

U tom smislu, u domenu medicinskog prava općenito, kao i medicinskog krivičnog prava, naročitu pažnju zavrijeđuje pravni položaj liječnika. Razmatrajući generalno pravni okvir medicinskog prava, autorice su u predmetnom radu nastojale predstaviti i analizirati pravni položaj liječnika u svjetlu važećih propisa u Federaciji Bosne i Hercegovine. Iako čini samo jedan segment medicinskog, pa i medicinskog krivičnog prava, uporedo sa razvojem medicine i svojevrsnom masovnošću zdravstvenih usluga koje se kontinuirano pružaju, pitanje pravnog položaja liječnika i odgovornosti koje iz tog položaja proizilaze, izdiferenciralo se kao izuzetno prijedorno pitanje u teoriji, kao i u praksi.

Rad je objavljen u Godišnjaku Pravnog fakulteta u Sarajevu, koji se indeksira u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (Hein Online). Od strane recenzenata ocijenjen je kao izvorni naučni rad, koji sadrži neobjavljene i nove rezultate originalnih istraživanja u potpunom obliku, daje značajan doprinos određenoj naučnoj problematiki ili njenom razumijevanju i opisuje nove rezultate istraživanja iz navedene oblasti.

Zaključak III:

Kandidatkinja ispunjava uvjet vezan za minimalno tri (3) naučna rada objavljena u priznatim publikacijama koje se nalaze u relevantnim naučnim bazama podataka.

Slijedom navedenog, kandidatkinja je tokom izbornog perioda u zvanju više asistentice objavila ukupno šest radova, od kojih su:

- I. četiri (4) naučna rada objavljena u priznatim publikacijama koje se nalaze u relevantnim naučnim bazama podataka, među kojima su tri (3) rada ocijenjena kao izvorni naučni, te jedan (1) kao pregledni naučni rad,**
- II. jedan (1) rad nije kategoriziran, u okviru zbornika radova koji nije indeksiran, a koji je Komisija ocijenila kao prethodno naučno saopćenje,**
- III. jedan (1) prikaz.**

Iako, kako je naprijed i istaknuto, Komisija radove objavljene do izbora u zvanje više asistentice ne razmatra, niti sadržajno ocjenjuje kod ocjene ispunjenosti uvjeta za izbor u zvanje docentice, potrebno je konstatirati da kandidatkinja ukupno promatrano ima jedanaest (11) objavljenih naučnih radova, te dva (2) prikaza i jedan (1) esej, što ukazuje na značajnu kontinuiranu naučnoistraživačku djelatnost kandidatkinje.

5.3. Nastavna djelatnost

Kandidatkinja je od 2018. godine zaposlena na Pravnom fakultetu u Sarajevu, Katedri krivičnog prava, naučnoj oblasti Krivično pravo, sa statusom (pravima i obavezama) asistentice, iako je prijem u radni odnos vezan za zvanje stručne saradnice, te je od 2022. godine u zvanju više asistentice. Slijedom navedenog, kandidatkinja je u naznačenim izbornim periodima počevši od ak. 2018/2019. godine bila angažirana kroz učešće u organizaciji i realizaciji nastave na I i II ciklusu studija, pripremu i realizaciju različitih oblika provjere znanja, redovne konsultacije sa studentima, rad na izradi i osavremenjavanju studijskih programa, uvođenje inovacija u nastavi i studijskim programima, saradnju sa studentima u toku realizacije svih oblika nastave, učestvovanje u različitim programima stručnog obrazovanja i usavršavanja, učešće u radu katedre, vijeća, te drugih stručnih organa članice, učešće u radu komisija vezanih za realizaciju I i II ciklusa studija na Fakultetu i obavljanje drugih poslova saradnika utvrđenih

zakonom, općim aktima Univerziteta/ Fakulteta po nalogu dekana članice, te druge povjerene poslove utvrđene zakonom, statutom, općim aktima Univerziteta i Fakulteta.

U studentskim evaluacijama u akademskim godinama od 2018/2019. do 2024/2025. kandidatkinja je dobila pozitivne ocjene studenata za izvođenje vježbi i drugih oblika nastave.

U okviru TRAIN (*Training & Research for Academic Newcomers*) programa je 2019. godine uspješno pohađala sadržaje/module preporučene za rad u visokom obrazovanju – istraživanje, naučno pisanje i publiciranje naučnoistraživačkih/umjetničkoistraživačkih rezultata (društvene i humanističke nauke), didaktika visokog obrazovanja, komunikacija i vještine prezentiranja, poduzetničke sposobnosti u visokom obrazovanju, planiranje kurikuluma u visokom obrazovanju i osnove andragoške djelatnosti u visokom obrazovanju. Navedeni program vrijednovan je sa 6 ETCS bodova i služi kao dokaz o minimumu pedagoškog obrazovanja.

Također, kandidatkinja je 2023. godine pohađala i UNSA DIGIEDU module iz oblasti pedagoških i digitalnih kompetencija, te su joj dodijeljeni certifikati o pohađanju modula kako slijedi:

- I. Vještine mentorisanja,
- II. NIR integritet i prevencija plagijarizma,
- III. IT aplikacije u podučavanju,
- IV. Trening trenera: postizanje interaktivnosti u nastavi,

Pored toga, kandidatkinja je pohađala i sljedeće seminare i edukacije:

- I. seminar „Interdisciplinarnost na Univerzitetu u Sarajevu“, u okviru Erasmus + projekta Re@WBC Enhancement of HE research potential contributing to further growth of the WB region, 5. 10. 2018., Sarajevo,
- II. edukacija „Etički principi u istraživanju“, Pravni fakultet Univerziteta u Sarajevu, 21. 11. 2019., Sarajevo
- III. seminar „Kako sastaviti, objaviti i ocijeniti naučno djelo“, Internacionalna akademija nauka i umjetnosti BiH, 12.03. i 13. 05. 2022. godine u Sarajevu.

Kandidatkinja je dva puta bila trener tima Pravnog fakulteta Univerziteta u Sarajevu za učešće na *Državnom takmičenju u simulaciji suđenja iz oblasti krivičnog prava*, i to 2017. godine, kao studentica II ciklusa studija, te 2018. godine, po prijemu u radni odnos na Pravnom fakultetu.

U prilog nastavničkim sposobnostima kandidatkinje govori i činjenica da je kandidatkinja bila angažirana kao predavačica na ljetnim školama, odnosno jesenjoj školi, kao i na webinaru kako slijedi:

1. na temu “Digital Violence Against Women from the Perspective of Criminal Legislation in Bosnia and Herzegovina” na jesenjoj školi “Law and Challenges of the Digital (R)evolution”, Instituta za kriminologiju pri Pravnom fakultetu Univerziteta u Ljubljani, 20.11.2025. godine., Ljubljana, Slovenija,
2. na ELSA Sarajevo webinaru na temu „Proučavanje argumenata za posebno krivično djelo femicida u pravnom okviru Bosne i Hercegovine“, 30.11.2023. godine,
3. na temu “Natural Disasters and Human Trafficking” na online međunarodnoj ljetnoj školi „Law on the Bosphorus 2023“ u organizaciji Pravnog fakulteta Univerziteta u Istanbulu, predavanje održano 24. 8. 2023., ljetna škola u trajanju od 21. 8. 27. 8. 2023., Istanbul, Republika Turska,
4. na temu „War Crimes Processing: a Case Study of Bosnia and Herzegovina“ na online međunarodnoj ljetnoj školi „Law on the Bosphorus 2022“ u organizaciji Pravnog fakulteta Univerziteta u Istanbulu, predavanje održano 15. 9. 2022., ljetna škola u trajanju od 10. 9. – 18. 9. 2022., Istanbul, Republika Turska,

5. na temu „Istanbul Convention: Country Report Bosnia and Herzegovina“ na online međunarodnoj ljetnoj školi „Law on the Bosphorus 2021“ u organizaciji Pravnog fakulteta Univerziteta u Istanbulu, predavanje održano 5. 8. 2021., ljetna škola u trajanju od 28. 7. – 8. 8. 2021., Istanbul, Republika Turska,
6. na temu „Impact of COVID-19 Pandemic on Criminal Law and Criminal Justice System in Bosnia and Herzegovina“ na online međunarodnoj ljetnoj pravnoj školi „Law on the Bosphorus 2020“, u organizaciji Pravnog fakulteta Univerziteta u Istanbulu u saradnji sa Pravnim fakultetom Leiden, Holandija, predavanje održano 18. 8. 2020., ljetna škola u trajanju od 15. 8. – 28. 8. 2020, Istanbul, Republika Turska,
7. na temu „Refugees and Internally Displaced People as Result of War in Bosnia and Herzegovina“ na međunarodnoj ljetnoj pravnoj školi „Law on the Bosphorus 2017“ u organizaciji Pravnog fakulteta Univerziteta u Istanbulu u saradnji sa Pravnim fakultetom Leiden, Holandija i Raul Wallenberg Institutom za ljudska prava i humanitarno pravo, Švedska, predavanje održano 4. 7. 2017., ljetna škola u trajanju od 3. 7. – 14. 7. 2017, Istanbul, Republika Turska.

Zaključak IV:

Kandidatkinja ispunjava uslov koji se odnosi na pokazane nastavničke sposobnosti.

6. Stručna djelatnost

Kandidatkinja je od septembra 2018. godine do decembra 2022. godine vršila funkciju Sekretara Katedre krivičnog prava. Od decembra 2022. godine do sada obnaša funkciju koordinatora II ciklusa studija na Katedri krivičnog prava. Kandidatkinja je u akademskoj 2021/2022. godini bila članica Vijeća Pravnog fakulteta u Sarajevu, kao predstavnik iz reda stručnih saradnika.

U dosadašnjem radu bila je članica brojnih stalnih i povremenih komisija Pravnog fakulteta u Sarajevu, među kojima su: Komisija za evaluaciju nastave i akademskog osoblja prvog i drugog ciklusa studija, Komisija za sprovođenje postupka ekvivalencije, Komisija za javne nabavke, Komisija za popis potraživanja, obaveza i novčanih sredstava, Tim za prevođenje samoevaluacijskog izvještaja studijskog programa I i II ciklusa studija na Univerzitetu u Sarajevu – Pravnom fakultetu za period 2019 – 2025. na engleski jezik (februar – mart 2025. godine). Od novembra 2025. godine članica je Komisije za izdavačku djelatnost Univerziteta u Sarajevu – Pravnog fakulteta.

Kandidatkinja je učestovala u organizaciji naučne konferencije „Alija Izetbegović i njegovo shvatanje prava i države“, održane 19. 10. 2018. godine u Sarajevu, koju je organizirao Univerzitet u Sarajevu u saradnji sa Yildirim Beyazit Univerzitetom u Ankari, Međunarodne tripartitne naučne konferencije "VIII Bosanskohercegovačko – hrvatsko – turski pravnički dani" na temu „Prednosti alternativnog rješavanja sporova“, održane 6. 4. 2019. godine u Sarajevu, kao i u izradi Knjige sažetaka tripartitne konferencije (prijevod s engleskog i turskog jezika, tehnička obrada i korektura za bosanski, hrvatski i srpski jezik). Pored navedenog, bila je i članica Izvršnog odbora Organizacionog odbora za obilježavanje 75 godina Pravnog fakulteta Univerziteta u Sarajevu, kao i članica Organizacionog odbora Prve panel diskusije o digitalizaciji i pravu, Blockchain: izazovi pravnoj regulativi u Bosni i Hercegovini. Trenutno je član Odbora za izradu monografije povodom obilježavanja 80 godina Pravnog fakulteta Univerziteta u Sarajevu, pod naslovom „Pravni fakultet Univerziteta u Sarajevu (1946-2026)“.

Od juna 2021. godine do januara 2024. godine bila je članica *Editorial Managment Board*-a časopisa „Journal of Penal Law and Criminology“, Istanbul University Press, u svojstvu *Editorial Assistant*.

U svim navedenim komisijama i tijelima kandidatkinja je dala vrijedan doprinos i istakla se svojom predanošću i angažmanom.

7. Učešće na domaćim i međunarodnim naučnim i stručnim skupovima i konferencijama

Kandidatkinja je kao referent bila učesnik na deset (10) domaćih i međunarodnih naučnih i stručnih skupova, od kojih je šest (6) tokom izbornog perioda u zvanju više asistentice:

a) tokom izbornog perioda u zvanju više asistentice:

1. *15th International Crime and Punishment Film Festival* with Academic program, izlaganje na temu: Femicide as a Separate Criminal Offense: A Milestone in Federation of Bosnia and Herzegovina, 26.11. – 02.12.2025., Bilgi Univerzitet u Istanbulu, Republika Turska;
2. Međunarodna konferencija *Rizična ponašanja u online okruženju u cilju prevencije nasilja na internetu*, izlaganje na temu: Nasilje na internetu u svjetlu krivičnog zakonodavstva u BiH *de lege lata* i *de lege ferenda*, 12.12.2024., Pravni fakultet – Univerzitet u Sarajevu;
3. Kongres krivičnog prava *Humbold-Kolleg Istanbul – 19 jähriges Jubiläum der türkischen Strafrechtsreform*, izlaganje na temu: Die Reformierung der Antikorruptionsgesetze in Bosnien und Herzegovina (koautorstvo sa prof. dr. Ferhatović Amilom), 1.6. – 4.6.2024., Bilgi Univerzitet u Istanbulu, Republika Turska;
4. *13th International Crime and Punishment Film Festival* with Academic program, izlaganje na temu: Hate Speech in Case Law of Courts in Bosnia and Herzegovina: Challenges and Perspectives (koautorstvo sa prof. dr. Ferhatović Amilom), 17.11. – 25.11.2023., Pravni fakultet Univerziteta u Istanbulu, Republika Turska;
5. *12th International Crime and Punishment Film Festival* with Academic program, izlaganje na temu: Violence against Women and Domestic Violence in Bosnia and Herzegovina: An Overview of the Implementation of the Istanbul Convention, 18.11. – 24.11.2022., Pravni fakultet Univerziteta u Istanbulu, Republika Turska;
6. II Kongres Ljekarske/Liječničke komore FBiH sa međunarodnim učešćem na temu *Medicinsko pravo*, izlaganje na temu: Razvoj i perspektiva medicinskog krivičnog prava u Bosni i Hercegovini (koautorstvo sa prof. dr. Ferhatović Amilom), 11.11. – 13.11.2022., Medicinski fakultet Univerziteta u Tuzli;

b) tokom izbornog perioda u zvanju stručne saradnice:

7. *10th International Crime and Punishment Film Festival* with Academic program, izlaganje na temu: The Presumption of Innocence in Bosnia and Herzegovina's Criminal Law (koautorstvo sa prof. dr. Ferhatović Amilom), 20. 11. – 26. 11. 2020., Pravni fakultet Univerziteta u Istanbulu, Republika Turska;
8. Tripartitna konferencija VIII Bosanskohercegovačko- hrvatsko- turski pravnički dani *Prednosti alternativnog rješavanja sporova*, izlaganje na temu: Kućni zatvor sa elektronskim nadzorom (koautorstvo sa akademikom, prof. dr. Petrović Borislavom i doc. dr. Ferhatović Amilom), 6. 4. 2019., Pravni fakultet Univerziteta u Sarajevu;

c) prije izbora u zvanje stručne saradnice:

9. *7th International Crime and Punishment Film Festival* with Academic program, izlaganje na temu: The 1973 Coup in Chile: Dealing with the Pinochet-Era Crimes, the Fight against Impunity and the Chilean path to democracy, 3. 11. – 9. 11. 2017., Pravni fakultet Univerziteta u Istanbulu, Republika Turska;
10. *6th International Crime and Punishment Film Festival* with Academic program, izlaganje na temu: Poverty as a post-war struggle in Bosnia and Herzegovina, 30. 9. – 6. 10. 2016., Pravni fakultet Univerziteta u Istanbulu, Republika Turska.

8. Naučni i stručni projekti

Kandidatkinja je uzela učešće u deset (10) projekata, od kojih je šest (6) od izbora u zvanje više asistentice:

a) u toku izbornog perioda u zvanju više asistentice:

1. Učešće u World Justice Project Rule of Law Index 2025,
2. Učešće u World Justice Project Rule of Law Index 2024,
3. Istraživačica na projektu „Nasilje na internetu“, koji se realizira u okviru naučne i tehnološke saradnje između BiH i Slovenije u ak. 2024/2025. godini,
4. Učesnica u projektu Nacionalnog centra za državne sudove u organizaciji studentske prakse za studente prava. Učešće u svojstvu koordinatorice studentske prakse na predmetu Kriminalistika u akademskoj 2023/2024,
5. Učešće u World Justice Project Rule of Law Index 2023,
6. Učesnica u JUST- ED projektu Nacionalnog centra za državne sudove Jačanje pravosudnog sistema kroz unapređenje praktičnog osposobljavanja studenata prava/ pripravnika u BiH. Učešće u svojstvu koordinatorice studentske prakse na predmetu Krivično pravo I u zimskom semestru akademske 2022/2023,

b) u toku izbornog perioda u zvanju stručne saradnice:

7. Učesnica u projektu Nacionalnog centra za državne sudove Kliničko obrazovanje za studente prava u Bosni i Hercegovini. Učešće u svojstvu koordinatorice studentske prakse na predmetu Krivično pravo I u zimskom semestru akademske 2021/2022,
8. Učesnica Jean Monnet Modula Language and EU Law Excellence u organizaciji Pravnog fakulteta Osijek u akademskoj 2020./2021. godini. (novembar 2020.- mart 2021.),

c) prije izbora u zvanje stručne saradnice:

9. Učesnica istraživačica u projektu World Universities Comparative Law Project, Legal rating of Bosnia and Herzegovina, Allen & Overy Global Law Intelligence Unit (2017.),
10. Učesnica u projektu Američke ambasade Praćenje suđenja u predmetima korupcije i organiziranog kriminala. (decembar 2016.- juni 2017.)

9. Ostale aktivnosti

Kandidatkinja je, obzirom da aktivno govori engleski, njemački i turski jezik, u više navrata bila angažirana u različitim svojstvima u sljedećim međunarodnim aktivnostima Pravnog fakulteta Univerziteta u Istanbulu:

1. kao član sudskog vijeća takmičenja u okviru ljetne škole Law on the Bosphorus 2022. godine (na engleskom jeziku),
2. u svojstvu učesnika filmskog panela na temu *“Documentation of Human Rights Violations Caused by Wars in Cinema”*, održanom nakon prikazivanja filma *“Sarajevo Safari”* (na turskom jeziku), a u okviru Međunarodnog film festivala „Zločin i kazna“ sa akademskim programom u novembru 2022. godine (na turskom jeziku),
3. kao moderator u okviru stručnog žirija, zajedno sa prof. dr Ines Fernandes Godinho (Lusofona University of Porto) i Anu Sivaganesen (University of Zurich), na panelu u okviru akademskog programa Međunarodnog film festivala „Zločin i kazna“ posvećenom izlaganjima Erasmus studenata na temu *“Vergleichende Beispiele aus der türkischen und deutschen Strafrechtsgesetzgebung aus der Perspektive der Gleichberechtigung”* (na njemačkom jeziku) u novembru 2022. godine (na njemačkom jeziku),

4. član sudskog vijeća takmičenja u okviru ljetne škole „Law on the Bosphorus“ 2023. godine (na engleskom jeziku).

Također, kandidatkinja je u okviru Klinike iz međunarodnog i evropskog prava ljudskih prava, koju je organizirala Elsa Sarajevo, uzela učešće u svojstvu predsjednice sudskog vijeća u finalnim rundama Klinike iz međunarodnog i evropskog prava ljudskih prava 29. 5. 2025. godine.

Sljedom navedenog, Komisija cijeni navedene angažmane kandidatkinje kao pokazatelj da je kandidatkinja prepoznata kao stručnjak iz svoje oblasti. Komisija također cijeni i posebno valorizira interesovanje kandidatkinje i za najistaknutije dodirne tačke medicine i prava, što je vidljivo ne samo iz učešća na Kongresu medicinskog prava, već i iz objavljenih radova na temu medicinskog (krivičnog) prava. Najzad, značajno je istaći i interesovanje kandidatkinje za naučnu razradu pravnih problema koji nužno iziskuju ne samo krivičnopravnu, već i širu pravnu ekspertizu, primjerom čega je i koautorski rad koji problematizira pitanje kontinuiteta zaštite oštećenog krivičnim djelom u sistemu krivičnog i građanskog pravosuđa.

ZAKLJUČNA OCJENA I PRIJEDLOG KOMISIJE

Na konkurs za izbor jednog nastavnika/ice u zvanje docenta/ice na predmetima naučne oblasti Krivično pravo na Univerzitetu u Sarajevu – Pravnom fakultetu, objavljenom dana 8. 12. 2025. godine u dnevnom listu „Dnevni avaz“ i na web stranicama Univerziteta u Sarajevu (www.unsa.ba) i Univerziteta u Sarajevu – Pravnog fakulteta (www.pfsa.unsa.ba) u ostavljenom roku za podnošenje prijava na konkurs (15 dana od dana objavljivanja) prijavila se jedna (1) kandidatkinja:

- **dr. Kanita Pruščanović**, viša asistentica Univerziteta u Sarajevu - Pravnog fakulteta na naučnoj oblasti Krivično pravo.

U postupku pripremanja prijedloga za izbor u akademsko zvanje docentice na naučnoj oblasti Krivično pravo, Komisija je ispunjenost uvjeta za izbor u akademsko zvanje docentice procjenjivala shodno objavljenom konkursu, prema odredbi člana 96. stav (1) tač. d) ZVO KS 2017 koji je prestao da važi, a procesna pravila koja su utvrđena važećim ZVO KS 2022, te Statutom univerziteta u Sarajevu i Uputama o realizaciji izbora u isto ili više akademsko zvanje na Univerzitetu u Sarajevu u skladu sa uvjetima propisanim ranijim Zakonom.

Nakon analize i ocjene navedene prijave i dokumentacije, Komisija je utvrdila sljedeće:

1. Kandidatkinja ispunjava uvjet vezan za naučni stepen doktora u datoj oblasti.

Kandidatkinja je treći ciklus studija na Univerzitetu u Sarajevu – Pravnom fakultetu, Katedri krivičnog prava – Krivičnopravnom smjeru okončala 1. 7. 2025. godine, odbranom doktorske disertacije na temu „Saučiniteljstvo kao oblik saučesništva u savremenom krivičnom pravu“, time stekavši naučno zvanje doktorice pravnih nauka.

Komisija je utvrdila da je kandidatkinja sve cikluse studija, uključujući i doktorski studij, završila sa najvišim ocjenama (prosječna ocjena na prvom ciklusu studija: 9.94, prosječna ocjena na II ciklusu studija: 10.00, prosječna ocjena na III ciklusu studija: 10.00), zbog čega je i dobitnica posebnog priznanja Zlatna značka Univerziteta u Sarajevu na prvom i drugom ciklusu studija. Također, Komisija je utvrdila da je kandidatkinja pohađala i polaganjem završnog ispita uspješno okončala i Dopunski studij iz njemačkog prava (*Begleitstudium im deutschen Recht*), koji se odvijao na njemačkom jeziku, a u organizaciji Pravnog fakulteta Univerziteta u Sarajevu u saradnji sa Njemačkom fondacijom za međunarodnu pravnu saradnju (IRZ).

2. Kandidatkinja ispunjava uvjet vezan za minimalno tri (3) naučna rada objavljena u priznatim publikacijama koje se nalaze u relevantnim naučnim bazama podataka.

Kandidatkinja je tokom izbornog perioda u zvanju više asistentice objavila ukupno šest (6) radova, od kojih su:

- I. četiri (4) naučna rada objavljena u priznatim publikacijama koje se nalaze u relevantnim naučnim bazama podataka, među kojima su tri (3) rada ocijenjena kao izvorni naučni, te jedan (1) kao pregledni naučni rad,
- II. jedan (1) rad koji nije kategoriziran, u okviru zbornika radova koji nije indeksiran, a koji je Komisija ocijenila kao prethodno naučno saopćenje,
- III. jedan (1) prikaz.

Komisija je konstatala da je kandidatkinja ispunila i kvantitativni i kvalitativni kriterij, te da je uvjet za izbor u zvanje docenta/ice u vezi sa brojem objavljenih naučnih radova ispunjen.

Ukupno promatrano, kandidatkinja je do sada objavila jedanaest (11) radova, dva (2) prikaza i jedan (1) esej, što dokazuje kontinuiranu posvećenost naučnoistraživačkom radu. Komisija također konstatira i posebno valorizira intelektualnu radoznalost kandidatkinje, koja je vidljiva kroz interesovanje za druge naučne oblasti, i to na prvom mjestu medicinu, što je primjetno iz objavljenih radova iz oblasti medicinskog krivičnog prava, ali i za naučnu razradu pravnih problema koji nužno iziskuju ne samo krivičnopravnu, već i širu pravnu ekspertizu, primjerom čega je i koautorski rad koji problematizira pitanje kontinuiteta zaštite oštećenog krivičnim djelom u sistemu krivičnog i građanskog pravosuđa. Time kandidatkinja pokazuje da posjeduje široko pravničko obrazovanje, kao i ekspertizu vezanu ne samo za krivično pravo, već i za druge naučne oblasti, što je poseban kvalitet koji odlikuje njen naučnoistraživački rad i spremnost za interdisciplinarna istraživanja.

Ocjene pojedinih radova date su prilikom njihovog detaljnijeg prikaza. Slijedom navedenog, ukupna ocjena naučnog opusa kandidatkinje je, prema stajalištu Komisije, izuzetno visoka.

3. Kandidatkinja ispunjava uslov koji se odnosi na pokazane nastavničke sposobnosti.

Kandidatkinja je nastavničke sposobnosti sticala i kontinuirano usavršavala pohađanjem brojnih seminara i edukacija, među kojima se ističu TRAIN (*Training & Research for Academic Newcomers*) program i UNSA DIGIEDU moduli iz oblasti pedagoških i digitalnih kompetencija. Komisija na osnovu pozitivnih ocjena studenata za izvođenje vježbi i drugih oblika nastave, angažmana kandidatkinje kroz vannastavne aktivnosti, odnosno brojnih angažmana kao predavačice na različitim programima u inostranstvu cijeni da je kandidatkinja pokazala izuzetne nastavničke sposobnosti.

4. Uz naprijed navedene zakonske uslove, Komisija je u skladu sa Smjernicama i kriterijima za način vrednovanja uvjeta za izbore u akademska zvanja iz člana 227. stav (2) Statuta vrednovala i cijeni da je kandidatkinja dokazala da posjeduje sljedeće:

- a) **nastavničke sposobnosti** i doprinos koji obuhvata: kvalitet realizacije nastave, prolaznost studenata, rad sa studentima na vannastavnim aktivnostima, inoviranje nastavnog procesa, učešće u aktivnostima unapređenja nastave i jačanje interkulturalnog iskustva studenata,
- b) **doprinos procesu internacionalizacije** koji obuhvata: međunarodnu mobilnost, učešće u aktivnosti strategije internacionalizacije Univerziteta, učešće u kreiranju i realizaciji cikličnih studijskih programa, te ljetnih škola, kao i jesenje škole, učešće u prestižnim međunarodnim konferencijama, učešće u uređivačkom odboru međunarodnog časopisa, učešće u međunarodnim projektnim timovima,

- c) **društveni doprinos** koji obuhvata: priznanja i nagrade dobivene od šire društvene zajednice, Univerziteta i visokoškolskih ustanova, rad na realizaciji aktivnosti vezanih za unapređenje institucije i razvoj zajednice, učešće u izdavačkom/uređivačkom odboru monografije, učešće u organizacionom odboru domaćih konferencija i okruglih stolova.

* * *

Na osnovu prethodno izloženih činjenica, cijeneći sve stručne, naučno - istraživačke i pedagoške kvalitete, te odgovarajuće reference u pogledu propisanih uvjeta, Komisija jednoglasno zaključuje da kandidatkinja dr. Kanita Pruščanović ispunjava sve uvjete za izbor u akademsko zvanje docentice propisane ZVO KS 2017. Komisija cijeni da je riječ o kandidatkinji koja je ostvarila izvanredne rezultate u svom dosadašnjem akademskom, naučnom i nastavnom radu, koji upućuju da je kandidatkinja u stručnom, naučnom i pedagoškom smislu profilirana za datu naučnu oblast.

Slijedom navedenog, Komisija Vijeću Univerziteta u Sarajevu – Pravnog fakulteta sa zadovoljstvom upućuje

PRIJEDLOG

da se dr. Kanita Pruščanović izabere u akademsko zvanje docentice na predmetima naučne oblasti Krivično pravo na Univerzitetu u Sarajevu – Pravnom fakultetu.

KOMISIJA



Akademik, dr. Borislav Petrović, profesor emeritus, predsjednik Komisije



Prof. dr. Amila Ferhatović, članica



Prof. dr. Barbara Herceg Pakšić, članica